

Mijdar 2009



YAŞA e.V.

Kurdish Centre for
Legal Studies and
Consultancy

Kurdisches Zentrum
für juristische Studien
und Beratungen

Navenda kurdî
ji bo lêkolîn û
rawêjkarîya yasayî

المركز الكردي للدراسات
والاستشارات القانونية

YASA e.V.
Postfach 7624
53076 Bonn
www.yasa-online.org

Pîr Ristem

Naverok:

- **Ji ber çalakiyên wan ên hunerî şeş meh sezaya zindanê li du welatîyên kurd hate birîn**
- **Ji 7 heya 12 salan sezaya zindanê ji bo pênc welatîyên kurd**
- **Ji bo sê siyasetvanên kurd sê sal zindan**
- **Siyasetvanê kurd Mihemed Salih Xelîl hate girtin**
- **Xwendekarê kurd Rojhat Mihemed Mihemed hate girtin**
- **Ewlekariya siyasî li Helebê du xwendekarên kurd digire**
- **Asayîşên elman endamê MAF Enewr Deqorî girtin**
- **Welatîyekî kurd wendayî ye**
- **Xwendekarekî kurd ji bajarê zanîngeh û zanîngeha Şamê hate avêtin**
- **Hinek çavkanî dibêjin ku siyasetvanê kurd Pîr Ristem hatiye girtin**
- **Bêrîvan Farûq Mihemed û Selîm Ezîz hatin girtin**

Ji ber çalakiyên wan ên hunerî şeş meh sezaya zindanê li du welatîyên kurd hate birîn

Rêxistina kurdî ji bo parastina mafên mirovan û azadiyên giştî li sûriyê DAD ragihand, ku dadgerê tek ê leşkerî li bajarê Qamişlo di roja yekşemê 01.11.2009an de biryar bi şeş meh zindan û 100 LS di der heqê du welatîyên kurd de da. Herdû welatîyên kurd Mihemed Seyfedîn El Xido (1986) û Nadir Newaf Xelîl (1981) ji bajarê Dirbêsiyê bi

endamtiya komeleyek nihênî û qedexe û herwiha gurkirin û arandina kînên zavî û tayîfî hatin tewanbarkirin.

Tê zanîn ku bargeha ewlekariya ramyarî ya bajarê Dirbêsiyê di 13.10.2008an de herdû welatîyên kurd Mihemed Seyfedîn El Xido û Nadir Newaf Xelîl ji ber çalakîyên wan ên hunerî û gelêrî girti bûn û di roja 13.04.2009an de ew serbest berda bûn.

Ji 7 heya 12 salan sezaya zindanê ji bo pênc welatîyên kurd

Di roja 03.11.2009an de dadgeha ewlekariya komarê ya bilind biryar ji 7 heya 12 salan sezaya zindanê di der heqê pênc welatîyên kurd de da. Welatîyên kurd ên ku hatin sezakirin ev in:

1-Cegerxwîn Mihemed Ekrem Şêxmûs (1989) di 15.01.2007an de hati bû girtin û Sefqan Reşîd Xelo (1990) di 19.02.2006an de hati bû girtin. Herdû jî bi 5 sal zindan hatin sezakirin. Ew bi endamtiya komeleyek siyasî, nihênî û qedexe (PYD), hewldana parçekirina beşekî ji xaka sûriyê û gihandina wî parçeyî bi welatekî biyanî ve hatin tewanbarkirin. Herwiha bi 10 sal zindan jî hatin tewanbarkirin bi behaneya ku ew hin kiryar dikin da ku cengek navxweyî li sûriyê pêk bê. Paşê biryara herî giran (10 sal zindan) li wan hate birîn.

2-Reşîd Xelo Xelo (1958) di 19.02.2006an de hati bû girtin û çar sal û nîv sezaya zindanê li hate birîn. Ew bi endamtiya komeleyek siyasî, nihênî û qedexe (PYD), û hewldana parçekirina beşekî ji xaka sûriyê û gihandina wî parçeyî bi welatekî biyanî ve hate tewanbarkirin.

3-Şukrî Xalid Umer (1988) di 09.02.2006an de hate girtin û sezaya pênc sal zindan lê hate birîn. Ew bi endamtiya komeleyek siyasî, nihênî û qedexe (PYD), hewldana parçekirina beşekî ji xaka sûriyê û gihandina wî parçeyî bi welatekî biyanî ve hate tewanbarkirin û hewriha bi behaneya ku ew bi hin kiryar ku cengek navxweyî li sûriyê pêk bê hate tewanbarkirin. Ji ber wilo biryar bi karên giran û cefayî hetahetayê lê hate birîn, paşê biryara dawî bi 12 sal zindan lê hate birîn.

Herwiha heman dadgehê di 08.11.2009an şeş sal zindan li çar welatîyên kurd ên din, ku endamên partiya yekîtiya ya demoqrat PYD ne, birî. Ew jî ev in:

1-Nasir Ehmed Mihemed (1987), xwendekarê amojgeha bijîşkî ye-Beşê Tîrêjan, sala duyem dixwîne. Ew di 06.08.2008an ji aliyê hêzên ewlekariya siyasî ve li Şamê hati bû girtin.

2-Raid Fewaz Elî di 19.07.2008an hati bû girtin.

3-Siûd Şêxmûs Ibrahîm di 25.01.2009an de hati bû girtin.

4-Ebdil Rehman Mistefa Mihemed (1974) di 26.11.2008an de hati bû girtin.

Ji bo sê siyasetvanên kurd sê sal zindan

Di roja 15.11.2009an de dadgeha tewankariyan li Şamê biryara sê sal sezaya zindanê da sê endamên serkirdayetiya Partiya Azadî ya Kurd li Sûriyê. Birzên Mistefa Cumaa Bekir, Mihemed Seîd Hisên El Umer û Sedûn Mehmûd Şêxo bi qelskirina hestên netewî (yên erebîtiyê) û arandin û gurkirina kînên zavî û tayîfî hatin tewanbarkirin, herwiha dadgehê ew ji mafên wan ên şarewerî jî bêpar kir.

Siyasetvanê kurd Mihemed Salih Xelîl hate girtin

Rêxistina kurdî ji bo parastina mafên mirovan û azadiyên giştî li sûriyê DAD ragihand ku di roja 11.11.2009an de komek ji hêzên ewlekariya leşkerî li bajarê Efrînê siyasetvanê

kurd û endamê nivîsgeha ramiyarî ya Partiya demoqrat a kurd li sûriyê El Partî birêz Mihemed Salih Xelîl girt. Tê zanîn ku birêz Mihemed Salih Xelîl di sala 1953an ji dayik bûye, xwedî malbat e û 4 zarokên wî hene. Hate ragihandin ku ew ji ber çalakiyên xwe yê siyasî hatiye girtin.

Xwendekarê kurd Rojhat Mihemed Mihemed hate girtin

Komîteyên parastina azadiyên giştî û mafên mirovan li sûriyê û hinek çavkaniyên mafnas li sûriyê ragihandin ku komek ji hêzên ewlekarî li bajarê Hesiçayê di roja 22.10.2009an de xwendekarê kurd Rojhat Mihemed Mihemed girt û ew ji bo şaxê ewlekariya siyasî yê bajarê Hesiçayê guhastin. Heya aniha çarenivîsa wî ne diyar e.

Ewlekariya siyasî li Helebê du xwendekarên kurd digire

Hate ragihandin ku bargeha ewlekariya siyasî ya bajarê Kobanî di roja 30.10.2009an herdu xwendekarên kurd Enter Şewket (1990, beşê huner û şewekariyê li bajarê Helebê, sala yekem dixwîne) û Mistefa Nesan (Li zanîngeha Beyrûtê dixwîne) vexwestin û paşê ji bo şaxê ewlekariya siyasî li bajarê Helebê hatin guhastin. Heya aniha çarenivîsa wan ne diyar e.

Asayîşên elman endamê MAF Enewr Deqorî girtin

Rêxistina mafên mirovan li sûriyê MAF ragihand ku asayîşên elman endamê wê yê rojnamevan Enwer Deqorî girtin. Asayîşên elman ew li gorî daxwaza navenda penberiyê ya Frensayê ew girtin. Ji ber ku Enwer Deqorî xwe wek penaber li Frensayê di sala 2008an de da bû û li wê derê salek zindan lê hati bû birîn û derbaskirin xaka Frensayê hetahetayê lê hati bû qedexekirin.

Paşê ew ji bo elmanyayê hati bû vgerandin ji ber ku ewî beriya Frensayê li Elmanyayê jî xwe wek penaber da bû. Di roja 12.11.2009an kargêriya biyaniyan li bajarên Aachen û Halle-Saale ji asayîşan xwestin ku wî bigirin û bişînin Frensayê, tevî ku parêzerê wî biryar ji dadgeha bilind a herêma Sachsen-Anhalt anî bû, ku dê carek din li rewşa Enwer Deqorî bête nihêrtin. Tê zanîn ku biryar hati bû standin da ew di roja 16.11.2009an bo Frensayê bête vegerandin, lê mixabin bi awayekî lez û j nişka ve di roja 12.11.2009an de hate vegerandin.

Welatîyekî kurd wendayî ye

Rêxistina mafên mirovan li sûriyê MAF ragihand ku birêz Neşet Mistefa Henan ku 45 salî ye ji roja 27.10.2009an ve ji aliyê komek hêzên ewlekariya siyasî ya bajarê Helebê hati bû girtin û paşê ji bo şaxê ewlekariya siyasî li bajarê Şamê hati bû guhastin, heya aniha wendayî ye. Hate ragihandin ku birêz Neşet Henan gelek caran pêrgî vepirsînên hêzên ewlekariyê bûye, nexasim ji Newroza 2008an ve. Heya aniha çarenivîsa wî ne diyar e.

Xwendekarekî kurd ji bajarê zanîngeh û zanîngeha Şamê hate avêtin

Rêxistina kurdî ji bo parastina mafên mirovan û azadiyên giştî li sûriyê DAD ragihand ku cîgirê zanîngeha Şamê û berpirsîyarê karûbarên kargêriyê û xwendekaran di 05.10.2009an de biryara 515 di der heqê xwendekarê kurd Bafil Elî de derxist.

Biryar dibêje ku dê Bafil Elî (Beşê Wêjeya Erebi li Zanîngeha Şamê dixwîne) salekê ji zanîngehê bête avêtin û herwiha bi yekcarî ji bajarê zanîngehê li Şamê bête avêtin. Ev biryar ji 16.03.2009an ve dest pê kiriye.

Tê gotin ku ev biryar di der heqê Bafil Elî de hatiye standin ji ber çalakiyên wî di warê ragihandin û rojnamevaniyê de. Tê zanîn ku hêzên ewlekariya leşkerî li Qamişlo ew di 05.04.2009an girti bû û paşê ji bo şaxê ewlekariya siyasî li Şamê (Şaxê Felestînê) hati bû guhastin û di roja 24.05.2009an de serbest hati bû berdan.

Hinek çavkanî dibêjin ku siyasetvanê kurd Pîr Ristem hatiye girtin

Rêxistina mafên mirovan li sûriyê MAF ragihand ku hinek nûçe bi dest xisitne dibêjin ku siyasetvan û nivîskarê kurd Pîr Ristem (Ehmed Mistefa, 1963) hatiye girtin. Nûçe dibêjin ku hêzên ewlekariya sûriyê yên li Beyrûtê ew girtine. Di dema dawî de ew di navbera Hewlêr û Beyrûtê de diçû û dihat û ji nişka ve têkilî hew pê re bû. Cara dawî ku têkilî pê re hate girêdan di roja 24,10.2009an de bû.

Tê zanîn ku birêz Pîr Ristem endamê rêxistina kurdî ji bo parastina mafên mirovan û azadiyên giştî li sûriyê DAD, endamê encûmena niştîmanî ya ragihandina Şamê û namzedê komîteya navendî ya partiya demoqrat a kurd li sûriyê El Partî ye. Herwiha 14 pirtûkên wî yên têvel hene wek roman, çîrok û lêkolînên bi zimanê erebî û kurdî.

Bêrîvan Farûq Mihemed û Selîm Ezîz hatin girtin

Rêxistina kurdî ji bo parastina mafên mirovan û azadiyên giştî li sûriyê DAD ragihand ku hêzên ewlekariya sûriyê di 17.11.2009an de Bêrîvan Farûq Mihemed û Selîm Ezîz vexwestin û paşê ew girtin.

Birêz Bêrîvan Farûq Mihemed û Selîm Ezîz di roja 18.10.2009an ji başûrê kurdistanê vedigeriyên û li balefirgeha Şamê hatin rawestandin û pasportên wan ji wan hatin standin. Paşê ew ji bo kargêriya mişextî û pasportan hatin guhastin û dawiyê ji hêla hêzên ewlekariyê ve hatin girtin. Heya aniha çarenivîsa wan ne diyar e.
